

दिनांक : 25.04.2026

समय : 18.45 बजे

आकाशवाणी जयपुर-अजमेर
प्रादेशिक समाचार

- प्रधान न्यायाधीश न्यायमूर्ति सूर्यकांत कह्यो-समाज ने रिटायर व्हा न्यायाधीशां रा अनुभव रो फायदो मिलतो रहवणो चाहिजे
- उपराष्ट्रपति सी. पी. राधाकृष्णन नौजवानां ऊँ ज्ञान ने विकसित भारत बणावण सारू काम लेवण बाबत् कह्यो
- प्रदेश मांय पडू री जबरदस्त गर्मी ऊँ जिन्दगी बेहाल-21 जिलां मांय पारो 41 डिग्री सेल्सियस ने पार कीनो, बाड़मेर मांय तापमान 44 डिग्री सेल्सियस ऊँ ऊंचो चढ्यो
- प्रधानमंत्री नरेन्द्र मोदी काल संवारे 11 बज्यां आकाशवाणी ऊँ प्रसारित कर्या जावण वाळा खास कार्यक्रम 'मन की बात' मांय विचार बतावेलीं

000

सुप्रीम कोर्ट रा प्रधान न्यायाधीश न्यायमूर्ति सूर्यकांत कह्यो है के जज कदे ई रिटायर नी व्हे है अर समाज ने वां रा अनुभव रो फायदो मिलतो रहवणो चाहिजे वे आज जयपुर मांय 'द बेंच बियॉन्ड रिटायरमेंट' मुद्दा माथे राखी ज्या राष्ट्रीय सम्मेलन मांय बोल रह्या हां सीजेआई पैली वाळा न्यायाधीशां री तुलना राजस्थान री पारंपरिक 'बावडियां ऊँ करता थकां कह्यो के बावडियां सूखा री बगत पाणी रा खास स्रोत रा तौर ऊँ काम आवे है वां ई भांत रिटायर व्हा जज न्यायिक व्यवस्था सारू अनुभव रा अनमोल खजाना हैं वे कह्यो के पैली वाळा जज मध्यस्थता, विधिक शिक्षा, मुकदमेबाजी ऊँ पैली री समझावण अर आवता बगत रा कानून रा जाणकार रा तौर ऊँ खास काम कर सके हैं ई मौके मुख्यमंत्री भजनलाल शर्मा कह्यो के देश री अदालतां कानी ऊँ दिया ज्या फैसला करोडां लोगां री जिन्दगी बेहतर बणायी हैं सीजेआई जनता ऊँ अदालत मांय जावण ऊँ पैली मध्यस्थता केंद्रां अर लोक अदालतां रो सहारो लेवण री अरज कीनीं कार्यक्रम मांय मुख्यमंत्री भजन लाल शर्मा कह्यो के न्यायपालिका हमेशा जनता रा हक री हिफाजत कीनी हैं

.....

कार्यक्रम रे दौरान राजस्थान हाईकोर्ट रा नुवा नवाचार 'यूनिफॉर्म रजिस्ट्रेशन नंबर सिस्टम' री सरुआत करी ज्यो ई सागे ई पैली वाळा न्यायाधीशां कानी ऊँ लिखी ज्या लेखां वाळी एक पोथी रो ई विमोचन करी ज्यो सम्मेलन मांय उप मुख्यमंत्री दिया कुमारी, राजस्थान हाईकोर्ट रा कार्यवाहक मुख्य न्यायाधीश न्यायमूर्ति संजीव प्रकाश शर्मा अर मोटी तादाद मांय न्यायिक अधिकारी अर कानून रा विद्यार्थी भाग लीनीं

000

उपराष्ट्रपति सी.पी. राधाकृष्णन नौजवानां ऊँ खुद री उम्मीदां ने देश बणावण रा काम ऊँ जोडबा सारू कह्यो हैं वे आज जयपुर मांय राजस्थान विश्वविद्यालय रा 35वां दीक्षांत समारोह मांय बोल रह्या हां श्री राधाकृष्णन कह्यो के नौजवान देश बणावण वाळा है अर वां ने ज्ञान विकसित भारत बणावण मांय काम लेवणो चाहिजे उपराष्ट्रपति टाबरियां कानी ऊँ सोना रा बत्ता तमगा हासिल करण री सराहवणा करता थकां कह्यो के टाबरियां देश रो भविष्य हैं जळसा मांय साल 2024-25 मांय परीक्षा पास करण वाळा दो लाख 71 हजार ऊँ बत्ता विद्यार्थियां ने उपाधियां दे र नवाजी ज्यां

ई मौके विश्वविद्यालयों रा कुलाधिपति राज्यपाल हरिभाऊ बागडे कहयो के नशीली दवाइयां काम लेवण सरीखी बुराइयां ऊँ बच र देश ने समर्थ अर ताकतवर बणावण सारु काम करणो चाहिजे श्री बागडे नौजवानां ने देश अर समाज रा प्रति जिम्मेदारी निभावण बाबत् कहयों

.....

कार्यक्रम मांय मौजूद उपमुख्यमंत्री अर उच्च शिक्षा मंत्री डॉ. प्रेमचंद बैरवा तालीम ने सब ऊँ मोटी ताकत बताता थका नौजवानां ऊँ विकसित भारत बणावण रो संकल्प सांचो करण मांय भागीदारी माथे जोर दीनों इण ऊँ पैली, उपराष्ट्रपति जयपुर मांय एक गैर सरकारी अस्पताल कानी ऊँ राखी ज्या 'कैंसर सर्वाइवर्स डे' कार्यक्रम मांय शामिल व्ह्यां वे कैंसर री बीमारी ऊँ बचाव सारु जनता मांय मोटा पैमाना माथे जाग जगावण रो अभियान चलावण री जरूरत बतायीं श्री राधाकृष्णन कहयो के प्रदेश मांय 'टीबी मुक्त अभियान' री भांत 'कैंसर मुक्त राजस्थान' अभियान चला र असरदार कोशिशों करणी चाहिजे वे कैंसर रा ईलाज मांय गोळी काम लेवण री नुवी पहल ने ई चोखी बतायीं कार्यक्रम मांय राज्य रा चिकित्सा अर स्वास्थ्य मंत्री गजेंद्र सिंह खीवसर ई मौजूद रहयां

000

प्रधानमंत्री नरेन्द्र मोदी कहयो है के नीति आयोग भारत री नीति बणावण री संरचना रो खास हिस्सा बण र सामी आयो है, जो सहकारी संघवाद अर सुधारां ने बधावो देवण अर जिन्दगी ने आसाण बणावण मांय खास काम कर रहयो हैं प्रधानमंत्री सोशल मीडिया पोस्ट रे जरिये कहयो के नीति आयोग न्यारा-न्यारा हलका मांय नवाचार अर लम्बा बगत री रणनीतिक सोच सारु गतिशील मंच रा तौर ऊँ काम करे हैं ई बीचे नीति आयोग रा नुवा बणायी ज्या उपाध्यक्ष अशोक कुमार लाहिड़ी आज नई दिल्ली मांय प्रधानमंत्री सागे मुलाकात कीनीं

000

देश मांय हर भांत री खाद री उपलब्धता स्थिर, सुव्यवस्थित अर जरूरत ऊँ बत्ती हैं रसायन अर उर्वरक मंत्रालय रे मुजब खाद री कमी रा लारला दिनां रा दावा तथ्यां माथे आधारित नी हैं मंत्रालय रे मुजब मौजूदा माली साल मांय 23 अप्रैल ताई ई यूरिया री उपलब्धता 18 **लाख 17 हजार** मीट्रिक टन री जरूरत रे मुकाबले 69 **लाख 33 हजार** मीट्रिक टन है, जद के डीएपी री उपलब्धता 5 लाख 90 हजार मीट्रिक टन री जरूरत रे मुकाबले **22 लाख 78 हजार** मीट्रिक टन हैं

000

प्रदेश मांय पड़ रही जोरदार गर्मी रे कारण जिन्दगी माथे घणो असर पड़ रहयो हैं बाड़मेर मांय पारो 44 डिग्री सेल्सियस ने पार कर गयो, जद के प्रदेश रा 21 जिलां मांय पारो 41 ऊँ 44 डिग्री सेल्सियस बीचे दर्ज कर्यो जा रहयो हैं म्हाणा खबरनवीस बतायो के सरहद माथे तैनात बी.एस.एफ रा जवान तेज तावड़ा बीचे ई लगातार पूरी मुस्तैदी ऊँ ड्यूटी कर रह्या हैं वठे पारो चढ़बा सागे ई सामाजिक संगठनां री ओर ऊँ परिन्दां सारु परिंडा बांध्या जा रह्या हैं हनुमानगढ़ मांय जिला कलेक्टर 27 अप्रैल ऊँ 8 वीं कक्षा ताई रा विद्यार्थियां सारु स्कूल रो बगत साढ़े सात ऊँ दोपहरां 12 बज्या ताई करण रो हुकम दीनो हैं सवाईमाधोपुर अर सलूंबर जिलां मांय ई पारो लगातार चढ़बा ऊँ जनता ने परेशानी रो सामो करणो पड़ रहयो हैं चिकित्सा अर स्वास्थ्य विभाग तेज तावड़ा मांय बाहर नी जावण अर बत्तो पाणी पीवण री राय दीनी हैं मौसम केंद्र जयपुर रे मुजब आवता दो दिन मांय पारो एक-दो डिग्री सेल्सियस और चढ़बा रा आसार हैं हालांकि, काल ऊँ 29 अप्रैल बीचे प्रदेश रा आतूणी अर उतराद हलकां मांय आंधी चालण अर बादळां री गाज सागे हल्की बारिश री संभावना हैं

000

प्रधानमंत्री नरेन्द्र मोदी काल संवारे 11 बज्यां आकाशवाणी ऊँ हर महीना प्रसारित कर्या जावण वाळा खास कार्यक्रम 'मन की बात' मांय विचार बतावेलां आं ई कार्यक्रम री 133 वी कड़ी व्हेलां कार्यक्रम रो प्रसारण आकाशवाणी अर दूरदर्शन रा पूरा नेटवर्क माथे कर्यो जावेलां ई सागे ई ओ कार्यक्रम ए. आई.आर. न्यूज़, डी.डी. न्यूज़, प्रधानमंत्री रा दफ़तर अर सूचना अर प्रसारण मंत्रालय रा यू-ट्यूब चैनलां माथे ई प्रसारित कर्यो जावेलां

000

लोकसभा अध्यक्ष ओम बिरला आज कोटा मांय जनसुणवाई कीनीं वे कोटा-बूंदी संसदीय हलका रा लोगां री समस्यावां सुण र अहलकारां ने परेशानियां तुरत आगी करण रा हुकम दीनां वां रो आज सांगोद मांय विकास रा 150 करोड़ रुपया रा खर्च वाळा कामां री सरुआत रो ई कार्यक्रम हैं

000

रेल मंत्री अश्विनी वैष्णव आज बेंगलुरु मांय हाई-स्पीड बुलेट ट्रेन बणावण रा कारखाना आदित्य रो उद्घाटन कीनों आकाशवाणी सागे बातचीत करता थकां वे बतायो के ई री पहली नकल आवता साल बण र तैयार व्हे जावेला अर अ गाड़ियां बणावण रो काम आवता साल रा आखिर मांय सरू व्हेलां

000

आज विश्व मलेरिया दिवस मणायी ज्यों ई मौके राज्य मांय चिकित्सा अर स्वास्थ्य विभाग री ओर ऊँ मलेरिया ऊँ बचाव अर रोकथाम सारू जाग जगावण बाबत् कार्यक्रम राख्यी ज्यां पाली ज़िला मांय स्वास्थ्य विभाग री ओर ऊँ पोस्टर अर बैनर रे जरिये मलेरिया रा लक्षणां अर ईलाज रा बारा मांय जाणकारी दीरीजीं मुख्य चिकित्सा अर स्वास्थ्य अधिकारी डॉक्टर विकास मारवाल बतायो के ज़िला मांय ए.एन.एम. अर आशा सहयोगिनियां रे मार्फत मच्छरां रा अण्डा खत्म करण सारू दवाइयां रो छिड़काव ई कर्यो जा रह्यो हैं झुंझुनूं मांय मलेरिया अर मच्छरां रे कारण व्हेवण वाळी दूजी बीमारियां रा प्रति जाग जगावण सारू कार्यक्रम राख्यी ज्यां ज़िला रा डिप्टी सीएमएचओ डॉक्टर भंवरलाल सर्वा बतायो के ओ दिवस मनावण रो मकसद मलेरिया, डेंगू अर चिकनगुनिया सरीखी बीमारियां माथे असरदार तरीका ऊँ काबू करण सारू जनता री भागीदारी बधावणो हैं

000

राजसमंद ज़िला मांय नाथद्वारा रा पीएमश्री राजकीय विद्यालय मांय टाबरियां ने कैंसर री बीमारी ऊँ बचावण सारू एचपीवी टीका लगावण रा बारा मांय जाग जगावण बाबत् कार्यक्रम राख्यी ज्यों सीएमएचओ डॉ हेमंत बिंदल बतायो के अ टीका मुफ्त लगाया जावेलां

000

डीग रेंज रा चार हजार हेक्टेयर जंगलात हलका मांय जिनावरां री गिणती सारू वन विभाग पाणी रा सात कुदरती स्रोतां री पिछाण कीनी हैं क्षेत्रीय वन अधिकारी प्रतिभा बतायो के जडखोर तळाव अर आदिबद्री समेत न्यारी-न्यारी ठौड़ां नुवा ट्रैप कैमरा अर जी.पी.एस. तकनीक काम ली जावेलां

000